

元人文集 上卷

元
代
史料刊
叢編
初編

黃山書社

御書

日月之縣象雲漢之爲章星辰之經緯皆天之文也及夫河出圖洛出書則有以通神明之德類萬物之情豈非造化之緼至是而著明歟天子言而爲訓誥誓命行而爲禮樂典章何徃而非文也至於萬幾之暇親御翰墨則刻之琬琰焜燿來世亦猶天之所爲其惟圖書乎我國家自世祖皇帝爰擇名儒以傳東宮是故裕宗皇帝之在春坊嘗有日習倣書藏之東觀以示子孫迨夫仁宗皇帝英宗皇帝時有宸翰寵賜羣臣

傳至 欽天統聖至德誠功大文孝皇帝則辭章
之粹書法之聖度越前代帝王矣猗歟盛哉

學校

古之有國家者設庠序學校以教其民申孝弟之
義導仁義之方所以扶植三綱五常之道也故自
王宮國都至于閭巷莫不有學秦漢以降率是而
行之則治違是而廢之則否明效大驗不可誣也
我朝自 太宗皇帝投戈講藝建學于燕四方諸
侯相繼興學迨夫 世祖皇帝之在潛邸也故金
進士元好問啓請爲儒教大宗師作其即位以道

建極文軌混同內設胄監外設提舉官以領郡縣
學校之事於是遐陬絕漠先王聲教之所未暨者
皆有學焉至元八年頒行國字又設蒙古字學視
儒學而加重自時厥後書院精舍月益歲增及夫
大司農之立則一鄉一社皆有學矣 列聖相承
百年之間幅員萬里黌舍相望何其盛也而我
欽天統聖至德誠功大文孝皇帝又設置授經郎
于奎章閣之下以教近臣貴戚子弟之幼者教學
自貴近始天下有不感化者乎外是醫藥卜筮之
流亦皆有肄習之所則名一藝者咸精其能矣若稽

周官鄉大夫之教屬地官大司樂之教屬春官今
國都郡邑之學載禮典鄉社之學則賦典具存云
藝文

我國家文學之盛上古聖賢以來諸儒經傳之學
史官載之書其主典之官則有翰林國史集賢等
院祕書國子等監而律歷陰陽醫卜之事竺乾之
教老莊之說又各有其人焉民間之書尚多也自
我朝之所作者製國字以通語言文字於萬方述
國制以示禮樂刑政於天下至若奎章之建閣斷
自宸衷緝熙聖學表章斯文所謂唐虞之際於斯

爲盛矣夫

貢舉

以科目取賢能之士歷周漢至于唐以來其目多矣我太宗皇帝旣取中原卽行試選取士之法至元中嘗議行進士科歷大德至大皆有議而未及行仁宗皇帝始以獨斷行之如茂異神童之科有則舉之非若進士科之有定額也而亦附見焉舉遺逸

國家取人之途多矣其有爲有能之士或不肯自售朝廷以禮徵聘而起之高爵厚祿以待之是以

貪夫廉薄夫敦鄙夫寬懦夫有立志者用此道也
以遺逸舉者百餘年間尚多有之而簡牘殊不備
書有徵者以啓其端

求言

昔者芻蕘之言聖人擇焉我國家來言者以達下
情言苟不當亦不加罪著在令甲其內外臣僚章
疏語在治典中禮曹職掌封事甚衆朝廷數使治
擇而采用之俟其成編則取而載之此

進書

工執藝事各進其技因以得官者蓋有之矣能文

之士以其所作來獻朝廷許之噫道成而上藝成而下君子亦兼取焉

遣使

昔我國家之臨萬方也未來朝者遣使喻而服之不服則從而征伐之事在政典此記使事而已天下既定郡縣既立有所詢問考察則遣使致命遐遠則遣使皆事已而罷彙有司之存牘爲此篇

朝貢

我國家幅員之廣極天地覆燾自唐虞三代聲教威力所不能被者莫不執玉貢琛以脩臣職於是

設官治館以待之梯山航海殊服異狀不可勝紀
案牘不具不得備書立此篇以俟考補

瑞異

古人有災異則謹書之所以儆天戒而思患豫防
也而祥瑞或缺不書者恐善佞者之生侈心焉今
災祥並置以考休咎之徵故簡牘有存者悉書之
右禮典上篇凡十有八目

郊祀

惟天子得祭天古之制也我國家建大號以臨天
下自有拜天之禮衣冠尚質祭品尚純帝后親之

宗戚助祭率其世職非此族也不得與焉報本反
始出於自然而非強爲之制者也有司簡牘可知者
憲宗皇帝始拜天於日月山既而又用孔子孫元
措言祭昊天后土始大合樂
世祖皇帝至於今制度弥文而國家之舊禮初不
廢也

宗廟

國初祭享之禮祖宗自有成法 世祖皇帝中統
元年秋七月祀 祖宗于中書省三年因建太廟
于燕京四年冬十有一月有事于太廟至元十七年

新作太廟于大都更定室次歲有恒祀

武宗皇帝始親享 英宗皇帝更作新廟始製鹵簿御衮冕行裸獻 今上中興先見廟而後即位親祀之禮史不絕書宜乎克戡大難身致隆平規模宏遠矣

社稷

古者有人民則置社稷至元二十九年始用御史中丞崔彥言以明年正月營社稷於和義門內南以春秋仲月上戊致祀牲牢噐幣三獻之禮八成之樂亞於郊廟之隆矣郡縣之祀風雨雷師皆

附見焉

嶽鎮海瀆

古者有事於方岳天子親之其在諸侯封內者則諸侯亦各得祀之秦漢之後嶽鎮海瀆全歸職方氏之時蓋鮮我國家混一名山大川咸在封域之內自世祖皇帝累降明詔以次加封歲時遣使禮焉

三皇

三皇配天立極有國家者載諸祀典禮亦宜之我國家通祀於天下祭儀略倣孔子之廟歲以春秋

之季行事而以醫者主之

先農

國家既得中原始立勸農司又置大司農專領耕桑之事歲有祈報於先農則其官主之請于

天子而行事焉

宣聖廟

有國家者通祀仲尼於天下其來尚矣我國家定中國廟祀如故而學隸焉舟車所至凡置郡縣之地無小大莫不皆有廟學其重者京師有國學之建東魯有闕里之祠至於褒封聖門之重崇撫儒

者之勤尤爲盛大矣

諸神祀典

神明之祀必因山川之形氣或有功德於人民可以禦災患可以立名教者則載之祀典非禮之禮不淫則諂在王政所宜禁者矣

功臣祠廟

古者諸侯有國大夫有家則有廟以祭其祖考功臣之立廟雖諸葛武侯之於蜀漢猶有所不許焉後世宗法不行諸侯大夫之家無廟以祭幾於忘其先矣我國家一二代勲勞之臣賜之廟而使之

祭皆異數云

謚

謚以易名所以定論平生也而羣臣之謚善惡具
在今善者多得謚而惡者無與立謚焉

賜碑

昔之有大勲勞於國家者勒之鼎彝以勸臣庶以
示其子孫後世伐石紀功以文其出自上旨者皆
異恩也其事具天官臣事茲著其目焉

旌表

詩云天生烝民有物有則民之秉彝好是懿德夫

孰無秉彝好德之心哉有國家者立爲法制使愚
不肖者有所觀感庶乎企而及之勉強以從之故
有忠臣孝子義夫節婦之目以風示天下我朝教
育之久有司上于禮部者無虛日旌異之書幾徧
海內可不謂之盛治哉

右禮典中篇凡十有二目

釋

佛氏之學其言以涵弘廣大爲宗我國家思以至
仁大慈覆燾萬物利益羣有是以崇尚其教而敬
禮之日盛月益大抵爲宗社生靈計也其事攷而